

■ COLUMNA

Si cun el e giu cun el!

DA MARIA CADRUVI

En las citads datti paraids per placats gronds. Format mundial penda qua. I vegn pajà persuerter. En vitgs e vischnancas pli pitschnas datti clavads cun paraids plain guttas plattas nua che mintgin sa plazzar sez ses placats, senza stuair dumandar. Quellas paraids n'èn per ordinari betg uffizialas e n'er betg commercialisadas. Igl è paraids ch'èn daventadas per tradiziun e disa paraids da placats. E qua pendani lura, ils avis per concerts e teaters, per referats e discussiuns, per lottos e fieras d'atun, per curs da Yoga, Zumba e Feldenkrais. E giu da quellas paraids rian era mintgantant candidatas e candidats avant elecziuns.

Jau guard gugent questas paraids cun placats pitschens. Ellas dattan perditga dad activitads da tut gener che cloman per atenziun. E mintgantant ma dumond'jau: Co è quai vairamain? Han quels e quellas che pendan si ils placats era da prender giu els? Quai fiss lura il princip dal chaschunader. E tge che gliez vul dir en la vita da mintgadi m'ha declarà ina giada in professer d'economia en la cafeteria da RTR. Per preparar in'intervista eran nus ids a bai-



ver café. E sco quai è en bleras cafetarias, il latg per il café vegn or dal Tetra Pak. Il pac dad in liter ch'era sper la maschina da café era quasi plain, uschia ch'insaquants daguts èn ids dasperas cura ch'il professer ha derschè cun slantsch e dinamica il latg en sia scadiola. Jau hai immediat vulì prender in sdratsch per prender si ils daguts. Ma il professer ha insistì ch'el sappia prender sez il sdratsch e nettegiar la chaussa. I valia il princip dal chaschunader, m'ha el ditg. Ed i saja per el ina chaussa che sa chapeschia da sasez dad observar quest princip.

Tar ils placats na sa chapeschia quest princip para betg da sasez. Bleras personas ch'han smatgà cun guttas plattas lur placat vi da la paraid, schend «si cun el», na din mai cura

ch'il placat n'è betg actual pli «giu cun el». Mintgantant fa la plievgia ina part da la lavur da dismetter chaussas dal passà. Mintgantant prendan ils proxims che dovràn plaz per lur urden giu il placats vegls. E mintgantant, magari avant elecziuns, svaneschan placats tut da sasez anc avant che votantas e votants sajan stads ad eleger. Ils chaus da personas che rian giu da las paraids perquai ch'ellas vulan ir en la politica svaneschan simpla-main uschia avant il temp. Quai n'è lura betg pli tenor il princip dal chaschunader, mabain tenor il princip da svidar il puppen cun restar mit sco la crappa. Betg «si cun el», proclamand che era auters audan, è la devisa, mabain «giu cun el» cura che gea nagin na vesa nagut.

Ma i dat era chaus dad aspirants politics che rian anc ditg suenter lur terrada giu da placats vid clavads. Quai è quels muments ch'jau ri enavos. Grazia a la persistenza dal palpieri e grazia al fatg ch'il princip dal chaschunader n'è betg vegnì observà hai num uschia magari anc emnas e mais «si cun el», cumbain ch'il pievel ha decidì gia d'urella a l'urna «giu cun el».

maria.cadruvi@spin.ch